

24 MAY 2001

AGONG HANTAR PERUTUSAN TAHNIAH KEPADA PRESIDEN ARGENTINA

KUALA LUMPUR, 24 Mei (Bernama) -- Yang di-Pertuan Agong Sultan Salahuddin Abdul Aziz Shah telah menghantar perutusan tahniah kepada Presiden Argentina Dr Fernando de La Rúa sempena Hari Kebangsaan negara itu esok.

Dalam perutusan kepada presiden, Yang di-Pertuan Agong dan Raja Permaisuri Agong Tuanku Siti Aishah melahirkan harapan agar negara Amerika Latin itu terus menikmati keamanan, kemajuan dan kemakmuran.

Teks perutusan itu telah dikeluarkan oleh Wisma Putra di sini, hari ini.

Perdana Menteri Datuk Seri Dr Mahathir Mohamad dalam perutusan tahniahnya kepada de La Rúa, memperbaharui undangannya kepada presiden itu supaya membuat lawatan ke Malaysia.

"Saya ingin mengingatkan kembali pertemuan kita di Buenos Aires tahun lepas dan ingin mengulangi komitmen saya untuk bekerjasama erat dan meningkatkan hubungan baik antara kedua-dua negara," kata beliau.

Dalam perutusan yang sama kepada Menteri Luar, Perdagangan Antarabangsa dan Keagamaan Argentina, Adalberto Rodriguez Giavarini, Menteri Luar Datuk Seri Syed Hamid Albar berkata beliau puas hati dengan hubungan dua hala antara kedua-ke dua negara yang wujud ketika ini.

"Sejak beberapa tahun ini, hubungan baik ini telah bertambah kukuh dan saya berharap ia dapat ditingkatkan lagi pada masa akan datang bagi faedah kedua-dua negara dan rakyat," kata beliau.

-- BERNAMA

MAM MAM ZB